



REPUBLIKA E SHQIPËRISË
KUVENDI

Nr. _____ Prot. _____

Tiranë, më _____ / _____ /2018

K Ë R K E S Ë

DREJTUAR:

ZOTIT GRAMOZ RUÇI
Kryetar i Kuvendit

KËRKUES:

KRYETARI I GRUPIT PARLAMENTAR TË PARTISË
DEMOKRATIKE
KRYETARI I GRUPIT PARLAMENTAR TË LËVIZJES
SOCIALISTE PËR INTEGRIM

OBJEKTI:

- 1) Kërkesë për interpelancë urgjente me Ministrin e Drejtësisë znj. Etilda Gjonaj.
- 2) Përfshirja e interpelancës si pikë e parë e rendit të ditës së seancës plenare më të afërt.

BAZA LIGJORE:

Neni 7 i Kushtetutës të Republikës së Shqipërisë, si dhe neni 97 i Rregullores së Kuvendit të Republikës së Shqipërisë.

Z. Ruçi,

Opinion i publik gjatë këtyre ditëve është njohur me një fakt të rëndë kriminal, ku në kundërshtim flagrant me ligjin, është lejuar ekstradimi në Itali i shtetasit Nezar Seiti. Nga dokumentacioni që disponon opozita dhe që është bërë publik edhe në media, rezulton se ky shtetas ka qenë i ndaluar dhe nën procedim penal nga Prokuroria pranë Gjykatës për Krime të Rënda të Shkallës së Parë, si pjesëtar i grupit të strukturuar kriminal "Habilaj". Konkretisht, ky shtetas ka qenë subjekt i procedimit penal, në të njëjtën çështje me ish-Ministrin e Brendshëm dhe deputetin e mazhorancës Saimir Tahiri, me nr. 134 e vitit 2016, nr. 164 e vitit 2017 dhe nr. 313 e vitit 2017. Informacioni i mësipërm ka qenë në dispozicion të Ministrisë së Drejtësisë (përfshirë Drejtorinë e Përgjithshme të Burgjeve) dhe Ministrisë së Brendshme (Policisë së Shtetit).

Referuar nenit 8 të Konventës Europiane për Ekstradimin, ku theksohet se: "Një Palë e kërkuar mund ta refuzojë ekstradimin që kërkohet për një person, kur ky bëhet objekt ndjekjeje prej saj për një ose më shumë vepra për të cilat kërkohet ekstradimi", si dhe referuar nenit 491 të Kodit të Procedurës Penale, ku specifikohet se: "Nuk mund të jepet ekstradimi: c) kur personi që kërkohet ka kryer një vepër penale në Shqipëri; ç) kur ka filluar procedimi ose është gjykuar në Shqipëri edhe pse vepra është kryer jashtë shtetit", Ministria e Drejtësisë do të duhej të kishte refuzuar ekstradimin, apo të kishte vendosur ekstradimin e shtyrë apo të përkohshëm.

Mirëpo, rezulton se Ministri i Drejtësisë, në injorim flagrant të detyrimeve të tij ligjore, ka urdhëruar ekstradimin e shtetasit Nezar Seiti dhe Drejtoria e Përgjithshme e Burgjeve

ka bërë dorëzimin e tij për qëllime të ekstradimit dhe nxjerrjen jashtë territorit të këtij shtetasi, edhe pse ka patur në dosje vendimet e Gjykatës për Krime të Rënda për caktimin ndaj tij të masës së sigurimit “arrest me burg”, për qëllime të procedimit penal në Shqipëri. Në këtë mënyrë, personi i vetëm i arrestuar dhe në dispozicion të autoriteteve të drejtësisë shqiptare, në kuadër të procedimit penal për grupin e strukturuar kriminal “Habilaj”, pjesë e së cilit dyshohet të jetë edhe ish-Ministri i Brendshëm Saimir Tahiri, aktualisht nuk është më në dispozicion të Prokurorisë pranë Gjykatës për Krime të Rënda.

Ky fakt mund të ketë efekt shkatërrues për procedimin penal që po kryen Prokuroria për Krime të Rënda në kuadër të grupit të strukturuar kriminal “Habilaj”, dhe për pasojë edhe mbi procedimin penal të nisur ndaj deputetit të mazhorancës dhe ish-Ministrit të Brendshëm, Saimir Tahiri.

Injorimi që Ministri i Drejtësisë i ka bërë jo vetëm ligjit, por edhe autoritetit të organeve të drejtësisë shqiptare (Gjykatës për Krime të Rënda), është një akt i paprecedentë për drejtësinë në vend, dhe një çështje urgjente që duhet të trajtohet nga Kuvendi i Shqipërisë, jo vetëm në kuadër të kontrollit parlamentar, por mbi të gjitha në kuadër të garantimit të parimit të ndarjes dhe balancimit të pushteteve. Nëse Ministri i Drejtësisë ndërmerri veprime arbitrare dhe të kundërligjshme, me impakt të drejtëpërdrejtë në prishjen apo dëmtimin e hetimeve penale në një çështje konkrete në vend, atëherë jemi përpara një krimi shtetëror, të padëgjuar më parë dhe që është bërë qëllimisht për të ndërhyrë në procedimin penal në ngarkim të deputetit të mazhorancës dhe ish- Ministrit të Brendshëm Saimir Tahiri.

Sqarimet ekstraligjore të Ministrit të Drejtësisë znj. Etilda Gjonaj se ekstradimi është bërë për shkak se ky shtetas është më mirë që të procedohet në Itali, apo se, nëse nuk do ishte vendosur ekstradimi opozita do ta akuzonte se po i fshehin personin drejtësisë italiane, është jo vetëm qesharak dhe i papërgjegjshëm, por mbi të gjitha tregues se për Ministrin e Drejtësisë dhe Qeverinë nuk ka rëndësi përmbajtja e ligjit, por vlerësimi politik. Nga ana tjetër, ky reagim publik i Ministrit të Drejtësisë provon se ekstradimi i kundërligjshëm është bërë qëllimisht dhe bazuar në motive ekstraligjore dhe qartazi politike. Në një shtet të së drejtës, udhëheqës për veprimet e autoriteteve publike, është ligji dhe vetëm ligji. Në rastin konkret, ligji nuk lejon ekstradimin kur ndaj personit ka një procedim penal në Republikën e Shqipërisë. Kjo ndalesë në Konventë dhe ligj, nuk është as rastësi dhe as e paqëllimtë. Ndalesa është vendosur me qëllim garantimin e efikasitetit të procedimit penal të nisur ndaj një shtetasi. Shkelja e këtij ndalimi sjell efektin e kundër të parashikimit ligjor dhe konkretisht prishjen apo dëmtimin e procedimit penal përkatës.

Në këto kushte, në përputhje me nenin 97 të Rregullores së Kuvendit të Shqipërisë, ku parashikohet se: *“Një Kryetar grupi parlamentar ose 7 deputetë mund të kërkojë zhvillimin e një interpelance për çështje urgjente”*, me qëllim marrjen e një informacioni të plotë mbi skandalin e ekstradimit të kundërligjshëm të shtetasit Nezar Seiti dhe masat që ka marrë Ministri i Drejtësisë për korigjimin e këtij akti të paprecedentë;

KËRKOJMË:

Zhvillimin e një interpelance urgjente me Ministrin e Drejtësisë znj. Etilda Gjonaj për të raportuar në lidhje me ekstradimin e kundërligjshëm të shtetasit Nezar Seiti dhe masat që ka marrë Ministri i Drejtësisë për korigjimin e këtij akti të paprecedentë.

Kjo kërkesë e opozitës parlamentare, bazohet edhe në nenin 7 të Kushtetutës, ku sanksionohet parimi i ndarjes dhe balancimit të pushteteve. Nën dritën e këtij parimi, merr përparësi funksioni i kontrollit parlamentar, i cili nënkupton të drejtën e pushtetit legjislativ për t'u informuar dhe për të realizuar mbikqyrjen për zbatimin e ligjeve nga organet e pushtetit publik, brenda kufijve të përcaktuar nga Kushtetuta, me qëllim marrjen e masave të domosdoshme për parandalimin e paligjshmërisë si dhe nxjerrjen e përgjegjësive, sipas rasteve konkrete. Të gjitha çështjet që përmbajnë në vetvete një interes publik përfshihen brenda funksionit të kontrollit parlamentar. Në këtë rast, respektimi i procedurave të ekstradimit apo ndalimeve mbi aprovimin e ekstradimit, është mundësia e vetme që një hetim penal i nisur nga autoritetet e drejtësisë në Shqipëri të mos dëmtohen. Për këtë arsye, deputetët kërkues e vlerësojnë të nevojshme zhvillimin e një interpelance urgjente me Ministrin e Drejtësisë.

Duke qenë se kjo çështje përbën shqetësim madhor dhe një çështje me natyrë urgjente për opozitën parlamentare, si dhe në kushtet e një sjellje konfuze dhe të papërgjegjshme të Ministrit të Drejtësisë deri në këtë moment, në mbështetje të paragrafit 2 të nenit 97 të Rregullores së Kuvendit, ku parashikohet se: *"Interpelanca për çështje urgjente, si rregull, depozitohet në Kuvend jo më vonë se dita e hënë në orën 14.00 dhe ajo zhvillohet si pikë e parë e rendit të ditës në një nga seancat plenare të javës në vijim"*,

KËRKOJMË:

Përfshirjen e kësaj kërkesë për interpelancë urgjente me Ministrin e Drejtësisë znj. Etilda Gjona në rendin e ditës të seancës plenare më të afërt.

Interpelanca në emër të deputetëve të opozitës do të zhvillohet nga deputeti Enkelejd Alibeaj.

Duke ju falënderuar për mirëkuptimin,

KRYETARI I GRUPIT PARLAMENTAR TË PARTISË DEMOKRATIKE

EDMOND SPAHO

KRYETARI I GRUPIT PARLAMENTAR TË LËVIZJES SOCIALISTE PËR INTEGRIM

PETRIT VASILI